

續
通
志

唐
列
傳

第
五
十
冊

續通志

列傳 十五

唐

郝處俊

狄仁傑

光嗣兼謨

崔

融

徐彥伯

蘇味道

豆盧欽望

史務滋周允元

崔元綜

朱敬則

郝處俊安州安陸人父相貴因隋亂與婦翁許紹據峽州歸國拜滁州刺史封甌山縣公處俊十歲而孤故吏歸千緡賙之讓不受及長好學嗜漢書畧能暗誦貞觀中第進士解褐著作佐郎襲父爵拜太子司議郎累遷

吏部侍郎高麗叛詔李勣為涇江道大總管處俊副之師入虜境未陣賊遽至舉軍危駭處俊方據胡床餐乾糒乃潛遣精銳擊敗之衆壯其謀拜東臺侍郎時浮屠盧伽逸多受詔合長年藥高宗將餌之處俊諫曰修短有命異方之劑安得輕服昔先帝餌浮屠那羅邇娑寐所為秘劑繼而大漸上醫不知所為羣臣請顯戮其人又恐取笑夷狄法遂不行前鑑不遠惟陛下深察帝納其言第拜盧伽逸多為懷化大將軍進處俊同東西臺三品咸亨初幸東都皇太子監國諸宰相皆留而處俊

獨從帝嘗曰重門擊柝蓋備不虞禁衛在於謹肅我嘗疑秦法為太寬荆軻匹夫耳匕首竊發羣臣莫敢拒者豈非寬慢使然處俊對曰此乃法急耳秦法輒升殿者夷三族人皆懼族安有敢拒耶魏曹操著令京城有變九卿各守其府後嚴才亂攻左掖門操登銅雀臺望之無敢救者王修聞變領官屬步至宮門操曰彼來者必王修乎此由修察變識機故冒法赴難向若拘常遂成禍矣故設法不可急亦不可慢帝曰善轉中書侍郎監修國史初令狐德棻劉允之撰國史後許敬宗復加緒

次帝恨敬宗所紀失實更命宰相刊正且曰朕昔從幸未央宮辟仗既過有橫刀伏草中者先帝斂轡却謂朕曰事發當死者數十人汝可命出之史臣惟叙此為實處俊曰先帝仁恩溥博臣弟處傑供奉時有三衛誤拂御衣者懼甚先帝曰左右無御史我不汝罪帝曰此史臣應載處俊乃表左史李仁實欲刪整偽辭會仁實死而止上元初帝觀酺翔鸞閣時赤縣與太常音技分東西朋帝詔雍王賢主東周王顯主西因以角勝處俊曰二王春秋少意操未定乃分為二朋使相誇耀非所以

導仁義示雍和也帝遽止歎曰處俊遠識非衆臣所逮遷中書令兼太子賓客檢校兵部尚書帝多疾欲遜位武后處俊諫曰天子治陽道后治陰德各有所主不相奪也天下者高祖太宗之天下非陛下之天下正應謹守宗廟傳之子孫奈何欲傳位天后乎中書侍郎李義琰曰處俊言可從事遂阻兼太子左庶子拜侍中罷為太子少保開耀元年卒年七十五贈開府儀同三司荊州大都督帝哀歎其忠舉哀光順門祭以少牢賻絹布米粟詔百官赴哭官庀葬事處俊性資約素始終不渝

然臨事敢言。自秉政在帝前。議論必傳經義。規獻得大臣體。武后雖忌之。以其操履無玷。卒不能害。子北叟。秘書郎。孫象賢。垂拱中為太子通事舍人。后素銜處俊。因事誅之。

狄仁傑字懷英。并州太原人。舉明經。調汴州參軍。閻立本為河南道黜陟使。仁傑為吏誣訴。立本召訊。異其才。謝曰。仲尼稱觀過知仁。君可謂滄海遺珠矣。薦授并州法曹參軍。同府參軍。鄭崇質母老且疾。當使絕域。仁傑謂曰。君可貽親萬里憂乎。詣長史蘭仁基請代行。仁基

咨美其誼。時方與司馬李孝廉不平。相語曰。吾等豈獨無愧耶。由是相待如初。稍遷大理丞。歲中斷久獄萬七千人。時稱平恕。左威衛大將軍權善才。右監門中郎將范懷義。坐誤斧昭陵柏。當免。高宗詔誅之。仁傑奏不應。死。帝怒曰。是使我為不孝子。必殺之。仁傑曰。漢有盜高廟玉環。文帝欲當之族。張釋之諍止。陛下法在象魏。固有差等。犯非極刑。而致之死。何哉。今誤伐一柏。殺二臣。後世謂陛下為何如主。帝意解。遂免死。數日授侍御史。左司郎中。王本立怙寵自肆。仁傑劾奏其惡。有詔原之。

仁傑曰朝廷雖乏才豈少本立之類陛下惜罪人而虧成法奈何臣願先斥為羣臣戒本立抵罪繇是朝廷肅然帝幸汾陽宮以仁傑為知頓使道出妬女祠俗言盛服過者致風雷之變并州長史李冲元乃發卒數萬改馳道仁傑曰天子之行風伯清塵雨師灑道何妬女避邪止其役帝壯之曰真大丈夫也出為寧州刺史撫和戎夏郡人立碑以頌御史郭翰巡察隴右入州境聞耆老歌刺史德美者盈路乃薦於朝徵為冬官侍郎持節江南巡撫使吳楚俗多淫祠仁傑奏毀千七百所止留

夏禹吳太伯季札伍員四祠而已轉文昌右丞出為豫州刺史時越王兵敗支黨餘二千人論死仁傑緩其獄密疏曰此輩誑誤咸非本心臣若不言恐乖陛下欽恤之意有詔悉戍邊囚出寧州父老迎勞曰狄使君活汝耶相與哭碑下齋三日乃去至流所亦為立碑初宰相張光輔討越王軍中恃功多暴索仁傑拒之光輔怒曰州將輕元帥耶仁傑曰亂河南者一越王貞耳公董士三十萬以平亂縱使暴橫使人咸墜塗炭是一貞死而百貞生也且王師之至民歸順以萬計奈何縱邀賞之

人殺降以為功。寃痛徹天。如得尚方斬馬劍。加君頸。死不恨矣。光輔啣之。還奏仁傑。不遜。左授復州刺史。徙洛州司馬。天授二年。以地官侍郎同鳳閣鸞臺平章事。武后謂曰。卿在汝南有善政。然有譖卿者。欲知之乎。謝曰。陛下以為過。臣當改之。以為無過。臣之幸也。譖者乃不願知。后嘆其長者。時太學生請急。后亦報可。仁傑曰。人君惟生殺柄。不以假人。至簿書會期。宜責有司。學徒取告。丞簿職耳。若為報可。則胄子數千。凡幾詔耶。為定令示之而已。后納其言。會為來俊臣所搆。捕送制獄。于時

訊反者一問。即承例減死。俊臣引仁傑置對。答曰。有周革命。我乃唐臣。反固實。俊臣乃寬其繫。判官王德壽以情謂曰。公必減死。我意欲求少階級。公為我引楊執柔可乎。仁傑嘆曰。皇天后土。使仁傑為此乎。即以首觸柱。血流沫面。德壽懼而謝。既承反守者寢弛。即丐筆書帛。置褚衣中。好謂吏曰。方暑。請付家徹絮。仁傑子光遠得書。上變。后遣使案視。俊臣命仁傑冠帶見使者。私令德壽作謝死表。附使以聞。后乃召見仁傑。謂曰。承反何耶。對曰。若不承反。死笞掠矣。曰。何為作謝死表。曰。無之。示

之乃知代署也因免死武承嗣請誅之后曰命已行不可返乃貶為彭澤令萬歲通天中契丹陷冀州河北震動擢仁傑魏州刺史前刺史懼賊至驅民保城修守具仁傑至曰賊在遠何自疲民萬一虜來吾自辦之何預若輩悉縱就田虜聞亦引去民愛仰之復為立祠俄轉幽州都督賜紫袍龜帶后自製金字十二於袍以旌其忠召拜鸞臺侍郎復同鳳閣鸞臺平章事時發兵戍疏勒四鎮百姓怨苦仁傑諫曰天生四夷皆在先王封域之外東距滄海西隔流沙北橫大漠南阻五嶺天所以

限中外也用武荒外邀功絕域得其人不足以增賦獲其土不可以耕織此秦皇漢武之所行也國家師旅歲出調度浸廣右戍四鎮左屯安東行役既久怨曠者多上不是恤害氣乃作害氣作則蟲螟生水旱起矣方今關東游饑蜀漢流亡江淮而南賦斂不息人不復本則相率為盜本根一搖憂患非淺昔貞觀中克平九姓冊拜李思摩為可汗使統諸部夷狄叛則伐降則撫得推亡固存之義無遠戍勞人之役今阿思那斛瑟羅皆陰山貴種代雄沙漠若委之四鎮以統諸蕃建為可汗遣

禦寇患。則國家有繼絕之美。荒外無轉輸之苦。何必窮其窟穴。與較計長短哉。且王者外寧。容有內危。陛下姑敕邊兵。謹守備。以逸待勞。以主禦客。堅壁清野。寇無所得。深入有顛躓之慮。淺入無虜獲之益。不數年。二虜不討而服矣。又請廢安東。復高姓為君。長省江南之轉輸。慰河北之勞弊。事雖不行。識者是之。張易之嘗從容問自安計。仁傑曰。惟勸迎廬陵王。可以免禍。會后欲以武三思為太子。仁傑曰。臣觀天人未厭唐德。比匈奴犯邊。陛下使三思募勇士。踰月不及千人。廬陵王代之。不浹

日。輒五萬。今欲繼統。非廬陵王不可。后怒。罷議久之。召謂曰。朕數夢雙陸不勝。何也。於是仁傑與王方慶同辭對曰。雙陸不勝。無子也。天其意者。以儆陛下乎。太子天下本本。一搖天下危矣。且姑姪與子母。孰親。陛下立廬陵王。則千秋萬歲。後常享宗廟。三思立廟。不祔姑。后悟。即日遣徐彥伯迎廬陵王於房州。王至。后匿之帳中。召見仁傑語廬陵事。仁傑敷請切。至涕下。不能止。后乃使王出。曰。還爾太子。仁傑降階泣賀。既已。曰。太子歸。未有知者。人言紛紛。何所信。后然之。更令太子舍龍門。具禮。

迎還中外大悅。初吉頊李昭德數請還太子。后意不回。惟仁傑每以母子天性為言。后漸省悟。故卒復唐嗣。尋拜納言兼右肅政御史大夫。突厥入趙定。殺掠甚衆。詔仁傑為河北道行軍元帥。假以便宜。突厥盡殺所掠男女萬計。由五回道去。仁傑追之不及。更拜河北安撫大使。時民多脅從于賊。賊已去。懼誅逃匿。仁傑上疏曰。山東之人。重氣一往。比緣軍興。調發繁重。傷破家產。又官吏侵漁州縣科役。投迹犬羊。以圖賒死。赦之則出不赦。則狂臣以為邊鄙暫警。不足憂中土不寧。可為慮也。願

曲赦河北。一不問罪。詔可。還除內史。后幸三陽宮。王公皆從。獨賜仁傑第一區。眷禮卓異。時無輩者。是時李楷固駱務整討契丹克之。獻俘會樞殿。后大悅。二人者本契丹李盡忠部將。盡忠入寇。楷固等數挫王師。後敗來降。仁傑稱其驍勇可任。若貸死必感恩納節。可以責功。至是凱旋。后舉酒屬仁傑。賞其知人。授楷固左玉鈐衛大將軍。燕國公。賜姓武務。整右武威衛將軍。后将造浮屠大像。度費數百萬。詔天下僧日施一錢。助之。仁傑諫曰。工不役鬼。必在役人。物不天降。終由地出。不損百姓。

且將何求。今邊陲未寧，宜省不急之務。就令顧作以濟窮人，既失農時，是為棄本。且無官助理，不得成。既費官財，又竭人力。一方有難，何以救之。后由是罷役，久視元年九月卒。年七十一。贈文昌右相。謚曰文惠。仁傑所薦。進若張柬之、桓彥範、敬暉、姚崇等，皆為中興名臣。始居母喪，有白鵲馴擾之祥。中宗即位，追贈司空。睿宗又封梁國公子。光嗣景暉。

光嗣聖歷初為司府丞。武后詔宰相各舉尚書郎一人。仁傑薦光嗣。由是拜地官員外郎。以稱職聞。后曰：「祁奚

按武衛將軍亦當是為
不載謹加案聲明

內舉果得人。歷淄許貝三州刺史。母喪，奪為太府少卿。固讓許之。累遷揚州長史。以罪貶歙州別駕。卒。景暉官魏州司功參軍，頗貪暴，民苦之。因共毀其父生祠。至元和，中田宏正鎮魏博，始奏葺之。族孫兼謨。

兼謨字汝諧，第進士。辟襄陽使府。剛正有祖風。憲宗詔為左拾遺。數上書言事。歷尚書郎。授鄭州刺史。以治行稱。擢給事中。左藏史盜度支纁帛。文宗以事在赦前，勿治。兼謨封還詔書。帝召諭之曰：「朕已赦其長官，吏亦宜宥。然今後或事有不可，勿以封詔為憚。」遷御史中丞。帝

曰。御史臺朝廷綱紀。一臺正則朝廷治。朝廷正則天下治。畏忌顧望。職業廢矣。卿梁公後當嗣家聲。兼謨頓首謝。江西觀察使吳士矩違額加給其軍。破官錢數十萬。兼謨劾奏。觀察使臨戎賞士。州有定數。士矩與奪由已。貽弊一方。請付有司治罪。士矩坐貶蔡州別駕。兼謨轉兵部侍郎河東節度使。還為尚書左丞。俄領天平節度使。辭疾。以祕書監歸洛陽。遷東都留守卒。

崔融字安成。齊州全節人。擢八科高第。累補宮門丞。崇文館學士。中宗在春宮。融為侍讀。典東朝表疏。武后幸

嵩嶽。見融所撰啓母廟碑。歎美之。封禪畢。即命撰朝覲碑文。授著作佐郎。遷右史。進鳳閣舍人。時有司議關市不限工商。凡行人盡征之。融上疏。謂關市之賦。以市多淫巧而關通未游。欲止抑之。故加稅耳。然唯斂工商而不及往來。今一切通取。則事不師古。且市者兼受善惡也。若甚則細人無所容。久必為亂。豪宗惡少。或致騷動。走蠻狄。今江津河滸。置鋪納稅。檢覆稽留。加以主司僦賂商人廢業。魏晉齊隋所不行。况陛下乎。后納之。張易之兄弟頗延文學士。融與李嶠蘇味道王紹宗等降節。

佞附。易之誅。貶袁州刺史。召授國子司業。與修武后實錄。封清河縣子。融為文典麗。當時罕有其比。朝廷大手筆。多手敕。委之。撰武后哀冊文。用思精苦。尋發病卒。年五十四。贈衛州刺史。謚曰文。六子。其聞者禹錫。翹。禹錫中書舍人。贈定州刺史。謚曰真。翹禮部尚書。贈荊州大都督。謚曰成。孫巨。右補闕。亦有文。曾孫從。

從。字子義。少孤貧。與兄能偕。隱太原山中。會歲饑。拾橡實以飯。講學不廢。第進士。辟山南嚴震府推官。以母喪免。兄弟廬墓。喪闋。不應辟命。久之。韋臯引為西山運務。

使。權知邛州事。前刺史有以盜繫獄。辭已具。從疑其寃。俄得真盜。臯卒。劉闢反。欲并東川。從以書諭闢。闢怒。攻之。從嬰城拒守。高崇文既敗闢。從完州自如。盧坦辟為宣州副使。入遷吏部員外郎。異時史給選者。成牒以先後。丐賕從。一限出之。後遂為法。裴度為中丞。奏從為侍御史。知雜事。度已相。代為中丞。彈奏不避權幸。事關臺閣。或付仗內者。必請還有司。選辟御史。務取質重。廉退者。李脩以寵得京兆尹。為莊憲太后山陵橋道使。務以減末徭費為功。至不治道。輜車留渭橋。久不得進。從三

劾之無少貸。俄授陝虢觀察使。進尚書右丞。王承宗之請割德棣而遣子入侍也。憲宗選從使宣諭。議者以承宗姦譎。頗憂之。從次魏。以童奴十數騎疾趨鎮。於毬場宣敕。諭以逆順。情辭慷慨。軍士感動。承宗自失。貌愈恭。至泣下。即按德棣戶口符印而還。其年為山南西道節度使。監軍使。知帝意欲大用之。每為中貴求金。從終不答。長慶初。繇尚書左丞領鄜坊節度。屬部多神策屯軍。數犯法。吏不能制。從撫遏。舉奏。下皆惕然。党項互市羊馬。類先遺帥守。從獨不受。寶歷初。為東都留守。拜戶部

尚書。宰相李宗閔以從與裴度李德裕善惡之。改太子賓客分司。東都從請。告百日罷官。物論咎執政。宗閔懼。復授檢校左僕射。淮南節度副大使。知節度事。揚府舊有貨麴之利。交易貨產。奴婢有貫。率錢畜羊。有口。筭每歲。牟其贏以佐用度。從悉除之。官吏俸帛常加估。以給獨節度使。則否。從亦估折給之。大和六年卒。贈司空。謚曰貞。從為人嚴偉。立朝稜稜。有風望。不交權利。忠厚而讓。階品當立門戟。終不請。位方鎮。內無妓樂。士大夫賢之。能字子才。佐渾瑊幕府。進累侍御史。鄭儋表為判官。

累遷黔中觀察使。坐為南蠻攻陷郡邑貶。從為中丞。奏以自代。拜將作監。授嶺南節度使。卒年六十八。贈禮部尚書。從子慎由。安潛。兄能子彥曾。俱別傳。

徐彥伯。兗州瑕丘人。名洪。以字顯。以河北道安撫大使。薛元超薦。對策高第。累轉蒲州司兵參軍。時司戶韋曷善判事。司士李巨工札翰。而彥伯以文辭稱。時謂河中三絕。遷職方員外郎。以奉迎中宗。房州進給事中。武后撰三教珠英。選天下文辭士。而彥伯李嶠居首。遷宗正卿。出為齊州刺史。帝復位。改太常少卿。以修武后實錄。

成。封高平縣子。為衛州刺史。政最壘。書勞勉。轉蒲州刺史。入為工部侍郎。尋除衛尉卿。兼昭文館學士。中宗時親拜南郊。作南郊賦以獻。辭甚典美。先天元年。以疾乞骸骨。許之。開元二年卒。彥伯事寡嫂。謹撫諸姪。同己子。晚年屬文。好為彊澀。頗為後進所效。始武后時。大獄興。王公卿士。以語言不慎。密為酷吏周興等所陷。彥伯著樞機論。以謂否泰榮辱。一繫于言。言以濟身。亦以覆身。無常階。亂不密致危。不可不慎。以戒於世云。

蘇味道。趙州樂城人。九歲能文。與李嶠齊名。時稱蘇李。

弱冠。州舉進士。累轉咸陽尉。吏部侍郎裴行儉才之。甚加禮遇。會征突厥。引管書記。裴居道進左金吾衛將軍。倩味道作謝表。援筆而成。辭理精密。盛傳于時。延載中。授鳳閣侍郎。同鳳閣鸞臺平章事。證聖元年。貶集州刺史。聖歷初。復入鳳閣。同平章事。長安元年。與張錫俱坐法繫獄。錫氣象自如。味道席地飯蔬。為危惴可憐者。武后聞之。流錫循州。釋味道。案新書本傳。味道與張錫繫獄。事在證聖元年。錫傳附之。大足長安之間。考之本紀及宰相表。兩人歷官皆與本傳不合。本傳誤也。吳鎮糾謬曰。當證聖之初。張錫猶未為相。味道貶集州。自有所坐耳。與張錫同下獄。自是再入相之後。久視長安之間。錫雖流竄。味道獲免。未嘗被

責也。論甚允協。今依通鑑。載在長安元年。是歲奉使幽平等州。按察兵馬還。

二年。進同鳳閣鸞臺三品。更葬其親。有詔令州縣治喪事。庸役過程。侵毀人墓。為蕭至忠所劾。貶坊州刺史。遷益州都督。長史張易之敗。坐朋黨。貶眉州刺史。復遷益州。未就道卒。年五十八。贈冀州刺史。味道善敷奏。練臺閣故事。然為相數載。未嘗有所發明。脂韋自營而已。嘗謂人曰。決事不欲明白。誤則有悔。摸稜持兩端可也。故世號蘇摸稜。性友愛。其弟味元為太子洗馬。嘗請託不諧。因謾折之。味道怡然。不以為忤。有文集行於時。

豆盧欽望。雍州萬年人。祖寬。隋文帝外孫。為梁泉令。高祖定關中。與郡守蕭瑀率豪右進款。累擢殿中監。子懷讓尚萬春公主。詔寬以魏太和中例。稱單姓為盧氏。貞觀中。遷禮部尚書左衛大將軍。芮國公。卒。贈特進。并州都督。陪葬昭陵。謚曰定。復其姓為豆盧。欽望累官司賓卿。長壽二年。拜內史。封芮國公。李昭德被罪。有司劾奏。欽望阿順昭德。附臣罔君。貶趙州刺史。入為司禮卿。遷秋官尚書。中宗還東宮。拜太子宫尹。進文昌右相。同鳳閣鸞臺三品。罷為太子賓客。帝復位。擢尚書左僕射。平

章軍國重事。欽望居宰相積十餘年。方易之三思等怙勢。宣烝圖為逆亂。不能有所匡正。惟謹身自全。進開府儀同三司。檢校安國相王府長史。卒年八十餘。贈司空。并州大都督。陪葬乾陵。謚曰元武。后時宰相又有史務滋。崔元綜。周允元。畧可述者附左方。

史務滋。宣州溧陽人。累至內史。后革命。詔務滋等十人分行天下。雅州刺史劉行實及弟行瑜。行感並為侍御史。來子珣誣其反。務滋素與行感善。欲寢其狀。后怒。命俊臣并治。務滋恐。遂自殺。

崔元綜鄭州新鄭人。祖君肅。武德中為黃門侍郎。鴻臚卿。元綜以天授初為鸞臺侍郎。同鳳閣鸞臺平章事。性恪慎。坐政事堂。束帶至晚。未嘗休偃。尤護細行。然外雖謹厚。而中實刻薄。每受制鞠獄。必澡垢索疵。不入死不肯止。人畏鄙之。未幾坐事流振州。朝野稱慶。會赦還。除監察御史。遷蒲州刺史。致仕。善攝生。年九十餘卒。

周允元字汝良。豫州安城人。自右肅政御史中丞拜檢校鳳閣侍郎。同鳳閣鸞臺平章事。武后宴宰相。詔陳書。傳善言。允元曰。耻其君不如堯舜。武三思劾以語有指。

斥。后曰。聞其言足以誠。安得為過。卒贈貝州刺史。

朱敬則字少連。亳州永城人。以孝義世被旌顯。一門六闕。相望。敬則志尚恢博。好學重節義。與左史江融。左僕射魏元忠。善。高宗聞。召見。異之。為中書令。李敬元所毀。故授洹水尉。久之。除右補闕。初。武后稱制。天下頗流言。至是漸寧。不絕告密羅織之路。乃上疏曰。國家自文明以來。天地草昧。內則流言。外則構難。故不設鈎距。無以順人。不切刑罰。無以息暴。於是置神器。開告端。故能不出房闈。而天下易主。今蒼生宴然。伏願改法制。立章程。

下寬大之令。流曠蕩之澤。去萋斐之角牙。頓姦險之芒刃。塞羅織之妄源。掃朋黨之險迹。曠然使天下更始。后善其言。遷正諫大夫。兼修國史。侍中韋安石嘗閱其稿。史歎曰。雖董狐何以加。奉宸府故控鶴監也。至是改之以張易之為奉宸令。又多選美少年為內供奉。敬則諫曰。陛下內寵有易之。昌宗足矣。近聞右監門衛長史侯祥等。明自媒銜。醜慢不恥。無禮無儀。溢于朝聽。臣職在諫諍。不敢不奏。太后勞之曰。非卿直言。朕不知此。賜綵百段。時賦斂繁重。民多蕩析。后數召入禁中。訪得失。進

同鳳閣鸞臺平章事。張易之構魏元忠。張說將陷重辟。無敢言者。敬則獨奏曰。元忠說秉心忠一。而所坐無名。殺之失天下望。乃得不死。以老疾還政事。俄改成均祭酒。冬。官侍郎。易之等嘗圖武三思。李嶠。蘇味道。李迥秀。王紹宗等十八人像。欲引敬則固辭。不與。世潔其為人。出為鄭州刺史。遂致仕。侍御史冉祖雍誣其與王同皎善。貶涪州刺史。既明其非罪。改廬州。代還。無淮南一物所乘。止一馬。子曹步從。以歸。卒年七十五。敬則與三從昆弟居。四十年。貲產無異。及執政。每以用人為先。嶺表

蠻叛。以裴懷古有文武才用為桂州都督。蠻服其威惠。相率降。薦魏知古為鳳閣舍人。張思敬為右史。皆稱職。嘗採魏晉以來君臣之事著十代興亡論。又以前代崔寔仲長統王朗曹冏等論封建者每指秦為失。乃著五等論。以為秦漢禮義陵遲不可復用。周制封諸侯。儒者是之初。二張寵盛。敬則密謂敬暉曰。公若假太子令。舉北軍誅易之兄弟。兩飛騎力耳。暉卒用其策。及睿宗嗣位。嘗曰。神龍以來。忠於本朝者。李多祚王同皎。韋月將。燕欽融。並褒復矣。尚有遺者。耶劉幽求曰。朱敬則忠正。

義烈。天下所推。往為宗楚客等誣奏。被謫。敬則嘗語臣曰。相王必受命。當悉心事之。及韋氏干紀。臣遂見危赴難。雖天誘其衷。亦敬則啓之。於是追贈祕書監。謚曰元兄。仁軌。隱居養親。有赤烏白鵲棲所居樹。按察使趙承恩表其異。及卒。郭山暉員半千。魏知古共謚為孝友先生。



